

DOMENIE XVI «VIE PAL AN»

Jutoris pe Liturgjie

Domenie, ai 22 di Lui dal 2018

La liturgjie di cheste domenie e podarès vè par titul: A jerin come pioris cence pastôr. Di fat, la prime leture e promet un pastôr che lu clamaran: “Signôr-nestre-justizie” intant che tal vanzeli Gjesù al viodè une grande fole di int, sbandade, cence direzion, cence sorestant o guide.

Al ven di domandâsi se al è o nol è il câs de societât li che o stin vivint.

Però cheste liturgjie e podarès sedi clamade ancje de “polse” parcè che Gjesù e i apuestui cu la barcje a lerin tun lûc cidin e fûr di man propit a polsâ.

Cence scugnî ridusi a ducj i cosej lis leziions a un nestri scheme prestabilît, ognun che al fasi come tun “self-service”: che al cjoli ce che al sint che i fâs ben. E, tal prin câs, o podin pensâ a lis comunitâts vuê - domenie - cence liturgjie e cence predi; tal secont, a ce polse, feriis, regalâ a la nestre vite par che e puedi sintî che la cjame e sta diventant lisere (cfr Mt 11, 30).

Ma intant, introdusînsi disint:

Antifone di jentrade

Sal 53,6.8

Ve, il Signôr al vignarà a judâmi,
il Signôr al ten sù la mê vite.
Cun dut il cûr ti ufrissarai il sacrifici,
il sacrifici di laut al to non ch'al è bon, Signôr.

Colete

Cjale di bon voli, Signôr, i tiei servidôrs
e multipliche sore di lôr i regâi de tô gracie
par che, ferbints te fede, te sperance e tal amôr,
a condurin tal meti in vore cun fedeltât i tiei comandaments.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Gjer 23,1-6

O tirarai dongje ce ch'al reste dal gno trop e o fasarai saltâ fûr par lôr pastôrs.

O sin ai tims dal profete Gjeremie (secul VII p.d.C.) e une peraule berlade e scualifiche i sorestants de politiche de culture e de religjon di Gjerusalem: Puars mai lôr i pastôrs... Tal lengaç dal timp e je une maledizion. Il Signôr, rineade chê categorie di incompetents, massepassûts e corots che a governavin, al zonte: o tirarai dongje ce ch'al reste dal gno trop e al conte dal so plan che al rivarà lontan.

Al è di just pensâ a la situazion di Gjerusalem prime di Crist, ma al è doverôs dâ une cjalade ancje a ce che o stin vivint. Cui sa ce che il Signôr al pense de plui part dai nestris sorestants di vuê? E in ce, come te lezion, lui nus invidial a sperâ?

Dal libri dal profete Gjeremie

«Puars mai lôr i pastôrs, ch'a dispierdin e a fischin il trop dal gno passon!»). Sentence dal Signôr! Par chel il Signôr, Diu di Israel, al dîs cussî cuintri dai pastôrs ch'a passonin il gno popul: «Vualtris o vês dispierdût il gno trop, lu vês parât vie e no si sês scomponûts. Ve chi ch'o soi: o pensarai jo par vualtris, pes vuestris tristeriis, pes vuestris voris, sentence dal Signôr! Par chel che mi rivuarde, o tirarai dongje ce ch'al reste dal gno trop di dutis lis tieris là che ju ai dispierdûts e o tornarai a

menâju tal lôr passon e a frutularan e si multiplicaran. Po o fasarai saltâ fûr par lôr pastôrs che ju passonaran e no varan teme e no si spaventaran e no 'nt mancjarà nancje un». Sentence dal Signôr!
«Ve: a rivaran dîs – sentence dal Signôr! –
che jo o fasarai saltâ fûr par David un butul just
e al regnarà propit di re; al sarà savi
e al metarà in vore il dirit e la justizie inte tiere.
Tai siei dîs Gjude al sarà salvât
e Israel al vivarà sigûr in cjase sô.
Chest al è il non che lu clamaran:
“Signôr-nestre-justizie”».
Peraule di Diu.

SALM RESPONSORIÂL

dal Salm 22

Te so esperience, l'autôr dal salm al conclût: no mi vent a dinissun, il Signôr al reste il gno pastôr; no mi fidarai di nissun, dome di lui.

Butâ di bande il Signôr al compuarte pleâ la schene ai grancj idolatrâts de tiere. Invezit, se mi sbassi dome davanti dal Signôr, chel mi ten lontan dal incensâ i idui di vuê.

Tal tesaur di cheste libertât cristiane o podìn ben dî cu la liturgjie:

R. Il Signôr al è il gno pastôr: no mi mancjarà nuie.

Se cjantât,: Il cjant dai salms responsoriâi, p. 153.

Mi fâs polsâ là che i passons a sverdein
mi mene là ch'a son aghis frescjis.
Al tire sù la mê vite, in grazie dal so non
mi mene par trois di justizie. **R.**

Ancje s'ò ves di cjaminâ par une foranate scure,
di nissun mâl no varès pôre, parcè che tu mi sês dongje;
il to baston e la tô vuiscje a son lôr che mi parin. **R.**
Tu prontis denant di me une taulade
presince dai miei nemîs,
il gno cjâf tu âs onzût di vueli
e il gno bocâl al è plen ch'al stranfe. **R.**

Propit, bontât e boncûr mi compagnaràn
ducj i dîs de mê vite,
te cjase dal Signôr
par une vore di agns o restarai. **R.**

SECONDE LETURE

Ef 2,13-18

Lui al è la nestre pâs, al à fat di doi popui une sole unitât.

Cetant consolant che e je cheste leture e cetant che e devi fâ pensâ te situazion de societât di vuê dividude di mûrs no dome fra potencis e stâts ma ancje fra cjase e cjase tra di nô. Noaltris o stin vivint tune societât malade di individualisim esasperât, ognun sierât te sô toresse e pront a sbarâ a chel dongje se al romp.

Pauli culî al cjacare de riconciliazion fra Ebreus e paians ma dut ce che al dîs al tocje ognun di nô; seont me une grande pagjine che no si finîs mai di meditâ par imparâ e ringraziâ il Signôr

De letare di san Pauli apuestul ai Efesins

Fradis, cumò in Crist Gjesù vualtris, che une volte o jeris i lontans, o sês diventâts i vicins in grazie dal sanc di Crist.
Di fat lui al è la nestre pâs

e al à fat di doi popui une sole unitât,
butant jù il mûr che ju divideve,
anulant te sô cjar la inimicizie,
cheste leç di comandaments cui siei ordins,
par rivâ a creâ in se, di doi popui, un sôl om gnûf
metintju in buinis,
e par riconciliâju ducj i doi cun Diu intun sôl cuarp
midiant de crôs,
dopo di vê copade in se la inimicizie.
Lui al è vignût par predicjâ la gnove de pâs
a vualtris, ch'o jeris lontans, e pâs a chei ch'a jerin vicins.
Midiant di lui, ducj i doi o podin presentâsi cun libertât
al Pari intun sôl Spirt.
Peraule di Diu.

CJANT AL VANZELI

Zn 10,27

R. Aleluia, aleluia.

Lis mês pioris a scoltin la mê vôs, al dîs il Signôr,
jo lis cognòs e lôr mi vegnin daûr.

R. Aleluia.

VANZELI

Mc 6,30-34

A jerin come pioris cence pastôr.

In chest vanzeli Gjesù nus dîs: Vignît fûr di man... polsait un pôc. O pensìn subit a dutis lis personis e fameis che a cirin ancje lôr, in chest mê, un moment di polse. Cence nuie cjoli e cence nuie zontâ a chest dirit sacrosant, ju ricuardìn al Signôr tes peraulis di Gjesù: Vignît di me ducj vualtris che o sês stracs e masse cjamâts, e jo us fararai polsâ (Mt 11, 28).

La seconde imagine nus presente une grande fole che a jerin come pioris cence pastôr; ognun cu la proprie esperience di paîs cuntun toc di predi o cence predi che al vierzi il so cûr a scoltâ ce che i dîs il Signôr che al scomençà a insegnâur tantis robis.

Dal vanzeli seont Marc

In chê volte, i apuestui si derin dongje di Gjesù e i contarin dut ce che a vevin fat e ce che a vevin insegnât. Alore lui ur disè: «Vignît fûr di man, tun puest cidin, e polsait un pôc». Di fat chei ch'a vignivin e a levin a jerin tancj che no vevin nancje il timp di mangjâ. Alore cu la barcje a lerin tun lûc cidin e fûr di man.

Ma une vore di lôr, che ju vevin viodûts a partî, a capirin e a scomençarin a cori là a pît di dutis lis citâts e a rivarin prin di lôr. Dismontant de barcje, al viodè une grande fole e i fasè dûl parcè che a jerin come pioris cence pastôr. Alore al scomençà a insegnâur tantis robis.

Peraule dal Signôr.

Su lis ufiertis

Diu, che inte perfezion di chest unic sacrifici
tu âs consacrade la diference cu lis vitimis de leç viere,
acete il sacrifici dai tiei servidôrs fedêi,
santifichilu come che tu âs santificât i regâi di Abêl
e ce che ognidun al ufrîs a la tô maiestât,
ch'al zovi pe salvece di ducj.
Par Crist nestri Signôr.

Antifone a la comunion

Sal 110,4-5

Al à lassade memorie dai siei spetacui:

al à dûl il Signôr e al è bon di cûr,
ur à dade la bocjade a di chei che lu rispjetin.

O ben:

Ap 3,20

Ve: jo o stoi a la puarte e o tuchi, al dîs il Signôr.
Se un al scolte la mê vôs e mi vierç la puarte,
o jentrarai li di lui, o cenarai cun lui e lui cun me.

Daspò de comunion

Signôr, ti preìn, cjale di bon voli il to popul
e, daspò di vêlu inscuelât cui misteris dal cîl,
dai di passâ de viere a la gnove vite.
Par Crist nestri Signôr.

* * *

Riflession di pre Antoni Beline: Polsait un pôc

Cualchidun al à vût scrit che Crist al è un om masse complet par no jessi ancje Diu. Plui si supe il vanzeli e plui si cjate cheste grande armonie e umanità e libertât e completece di Crist. Lui che al è trement e cence filet te lenghe cui fals e cui bausârs, al devente dolç plui che no une mari cun chei che a son stracs e cjamâts dal pês de vite e des miseriis de vite. Lui che al rispjete la leç cuntun puntilgjo...

Vanzeli par un popul, an B, p. 135.

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

*Tu nus âs fats par te, Signôr,
e il nestri cûr nol cjate polse
fin che nol polse in te.*

S. Ustin

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianità todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*

* *Par domandâ chescj libris scrîvêt a info@glesiefurlane.org*